

Skýrsla Menntanefndar LH – Október 2015

Nefnd: Sigríður Pjetursdóttir (formaður), Arndís Brynjólfsdóttir, Hlín Christiane Mainka Jóhannesdóttir, Line Nörgaard, Herdís Reynisdóttir og Jóna Dís Bragadóttir.

Helstu verkefni:

Menntaráðstefna:

Við fengum fyrirspurn frá Menntanefnd FEIF að skipuleggja menntaráðstefnu haustið 2016 á Íslandi sem ber yfirskriftina “Knapinn”. Við tókum vel í það og skipulögðum hana. Tilbúin er auglýsing með fyrirkomulagi og búið að er setja saman dagskrá með þungavigtarfólki í hverri stöðu. Í Malmö á nefndarfundum FEIF var svo tekin sú ákvörðun að færa þessa ráðstefnu á haustið 2017 þar sem önnur fyrirhuguð menntaráðsstefna verður haldin í Svíþjóð í vor. En þar leiða saman hesta sína menntanefnd FEIF og endurmenntun FEIF dómara. Yfirskriftin þar er “Tölt in Harmony”. Það þótti því ekki hentugt að hafa 2 stórar menntaráðsstefnur sama árið. Þetta gefur okkur bara meira tækifæri að skipuleggja þetta til þrautar og við tökum síðan bara slaginn haustið 2017.

Tenging við Menntanefnd FEIF:

Formaður fór á nefndarfund FEIF í Malmö og átti gott samtali við Menntanefnd FEIF, kynnti fyrir þeim helstu verkefni okkar á Íslandi og fékk að heyra það helsta sem er í kortunum hjá þeim. Gott að koma á tengingu þar á milli. Þau óskuðu eftir frekara samstarfi í framtíðinni og mikill vilji á báða bóga að styrkja tengslin.

Annars er margt jákvætt að gerast í menntamálum í hestamennsku á Íslandi í dag og hér verða nefnd nokkur atriði sem að báru á góma hjá okkur í nefndinni:

Raunfærnimat í hestamennsku:

Útskrift í raunfærnimati í hestamennsku fór fram í fyrsta skipti þann 26. janúar 2015. Það voru 17 einstaklingar sem tóku þátt í verkefninu og notuð voru viðmið hestabrautar Fjölbrautaskóla Suðurlands. Raunfærnimat snýst um að meta reynslu og þekkingu sem fenginn er á vinnumarkaði til móts við kröfur skólakerfis í viðkomandi grein. Til mats voru 40 einingar og fengu þátttakendur mismikið metið allt eftir reynslu og getu. Segja má að verkefnið, sem er fyrsta sinnar tegundar á Íslandi, hafi gengið vonum fram og þátttakendur almennt ánægðir með útkomuna.

Þetta var viðamikil verkefni og kostnaðarsamt en Fræðslunetið símenntun á Suðurlandi fékk svokallaðan IPA styrk til þessa verkefnis sem gerði okkur kleift að þróa og framkvæma mat á þessu sviði. Það er von okkar að fleiri sem starfa á þessu sviði muni eiga þess kost að taka þátt í raunfærnimati. Ljóst er að verkefnið hefur vakið þátttakendur til umhugsunar um gildi fagmennsku í hestamennsku og verður vonandi stökkpallur til frekari þekkingarleitar. Hestamennska er vaxandi atvinnugrein á Suðurlandi og því mikilvægt að þar haldist í hendur fagmennska og þróun.

Að verkefninu stóðu m.a. Sigríður Pjetursdóttir, fagstjóri á hestabraut Fsú, Sigurður Torfi Sigurðsson, járngameistari og kennari á hestabraut, Haraldur Þórarinnsson, fyrrv. formaður LH, en þessir aðilar skipuðu stýrihóp sem lagði drög að matinu.

Raunfærnimat í hestamennsku verður einnig í boði haustið 2015.

Styrkir til þróunar á námi í hestamennsku:

Fræðslunet Suðurlands ásamt formanni menntanefndar fengu Erasmus+ styrk fyrir 6 aðila til þess að kynna sér menntun í hestamennsku og járnungum í Svíþjóð. Farið verður í ferðina í byrjun febrúar 2016.

Stefnt er á að sækja um áframhaldandi styrki til að þróa fremur þetta verkefni.

Hestabrautir í Framhaldsskólum:

Fjölbrautarskóli Suðurlands:

Hestabraut FSU bauð nú í fyrsta skipti á haustönn upp á stúdentsbraut í hestamennsku. Því munu á vormisserum 2016 í fyrsta skipti í Íslandshestaheiminum útskrifast nemendur af slíkri braut. Námið sem hefur hingað til verið 2 ára braut er nú orðin að þriggja ára stúdentsbraut. Þó geta nemendur einnig tekið tvö ár á hestabrautinni en tekið aðra braut með og útskrifast þannig. Eins geta nemendur valið að láta staðar numið eftir 2 ár og útskrifast þá sem hestaliðar. Hestabraut FSU er í sífelldri þróun og vexti og koma nemendur víða af landinu til að stunda nám þar. Mikil ásókn var í að komast inn á 3 árið og er þar flottur hópur samankomin sem flest stefna á frekara nám í hestamennsku.

Fjölbrautarskóli Norðurlands vestra:

Þar hóf göngu sína hestabraut að nýju eftir nokkurt hlé. En námið þar er nokkuð sambærilegt við námið í FSU. Þar sem stúdentsbrautin var unnin í samstarfi milli þessara tveggja skóla. Fyrsti hópurinn á stúdentbrautinni er sterkur hópur og það verður gaman að fylgjast með þeim á næstu misserum.

Framhaldsskólinn í Mosfellsbæ:

Býður einnig upp á hestabraut sem skilar nemendum með hæfni á 2. þrepi sem hestasveinum. Hestasveinn vinnur sem aðstoðarmaður í hvers konar hestatengdri starfsemi, svo sem á hestabúgörðum, við hestatengda ferðaþjónustu eða hjá öðrum sambærilegum fyrirtækjum. Hann sinnir helstu verkþáttum í hirðingu hesta og aðstoðar við þjálfun þeirra. Hann aðstoðar viðskiptavinum í hestaferðum hjá hestatengdum ferðaþjónustufyrirtækjum og getur leiðbeint um grunnþætti hestamennsku. Brautin er 90 feiningar og meðalnámstími er 3 annir.

Knapamerkin:

Ræddum um knapamerkin og framtíð þeirra. Hlín Christiane Mainka Jóhannesdóttir hefur tekið við umsjón þeirra. Mikið er lagt upp úr því að ná að þýða bækurnar yfir á ensku sem fyrst og gefa þær þannig út. Miklir möguleikar í knapamerkjum og nú fer vonandi að koma að því að nágrannaþjóðir okkar getið notið þeirra líka.

Margt annað spennandi í kortunum og við hlökkum til að takast á við áframhaldandi starf innan menntanefndarinnar.

Fyrir hönd Menntanefndar LH – Sigríður Pjetursdóttir